

11/06/2005

MENTERI LUAR THAI LAWAT GALERIA PERDANA DAN KERETA KABEL

LANGKAWI, 11 Jun (Bernama) -- Menteri Luar Thailand Dr Kantathi Suphamongkhon hari ini meluangkan masa hampir sejam melawat Galeria Perdana di Kilim di sini yang menempatkan lebih 2,000 cenderamata yang diterima bekas Perdana Menteri Tun Dr Mahathir Mohamad.

Dr Kantathi yang diiringi Pengurus Besar Lembaga Pembangunan Langkawi (Lada) Kamarulzaman Abdul Ghani, Konsul Kehormat Thailand di Langkawi Datuk Shazryl Eskay Abdullah dan para pegawai kanan Kementerian Luar negara itu, diberi penerangan mengenai koleksi cenderamata bekas Perdana Menteri itu oleh Pengurus Galeria Perdana, Mahani Mohamad.

Dr Kantathi sedang mengadakan lawatan dua hari ke Langkawi sempena perasmian pejabat Konsul Thailand di sini oleh Dr Mahathir malam tadi.

Menteri Luar Thai itu turut menaiki kereta kabel di Gunung Mat Chincang untuk melihat keindahan panorama Langkawi.

Lawatan itu mendapat liputan 20 wakil media cetak dan stesen televisyen Thailand.

-- BERNAMA

ZI MZM KHY